



Broj: 01/09-04-76/26

Datum: 07.01.2026. godine

Na osnovu člana 79. stav (1) Statuta Grada Sarajeva („Službene novine Kantona Sarajevo“, broj 7/23) i člana 8. Zakon o principima lokalne samouprave u Federaciji Bosne i Hercegovine, („Službene novine Federacije BiH“, br. 49/06 i 51/09), Gradonačelnik Grada Sarajeva donosi:

PRAVILNIK

o postupku, uslovima i kriterijima za dodjelu namjenskih sredstava za projekte obnove i izgradnje igrališta, parkova, javnih površina i šetnica u okviru Javnog poziva Grada Sarajeva

I. OPĆE ODREDBE

Član 1.

(Predmet Pravilnika)

Ovim Pravilnikom uređuju se postupak, uslovi i kriteriji za dodjelu namjenskih sredstava iz Budžeta Grada Sarajeva za finansiranje projekata obnove i izgradnje igrališta, parkova, javnih površina i šetnica na području Grada Sarajeva, putem Javnog poziva (u daljem tekstu: Javni poziv).

Član 2.

(Cilj Pravilnika)

Cilj ovog Pravilnika je unapređenje javne infrastrukture, poboljšanje kvaliteta života građana te osiguranje sigurnih, funkcionalnih i javno dostupnih prostora na području Grada Sarajeva.

Član 3.

(Pravni osnov)

Pravni osnov za donošenje ovog Pravilnika čine:

- Statut Grada Sarajeva („Službene novine Kantona Sarajevo“, broj 7/23),
- Zakon o principima lokalne samouprave u Federaciji Bosne i Hercegovine, („Službene novine Federacije BiH“, br. 49/06 i 51/09),
- Budžet Grada Sarajeva za 2026. godinu,
- Smjernice o minimalnim standardima dodjele transfera i subvencija u Federaciji Bosne i Hercegovine („Službene novine FBiH“, broj 37/24).



II. FINANSIJSKI OKVIR

Član 4.

(Ukupan iznos sredstava)

Ukupan iznos sredstava koji se dodjeljuje u skladu sa ovim Pravilnikom iznosi 500.000,00 KM.

Član 5.

(Način dodjele sredstava)

Sredstva se dodjeljuju za projekte, u skladu sa ostvarenim brojem bodova i raspoloživim budžetskim sredstvima.

III. PRAVO UČEŠĆA

Član 6.

(Podnosioci prijava)

Pravo učešća na Javnom pozivu imaju isključivo gradske općine u sastavu Grada Sarajeva.

IV. OPĆI KRITERIJI PRIHVATLJIVOSTI

Član 7.

(Opći kriteriji)

Projekat se smatra prihvatljivim ukoliko:

1. je u skladu sa predmetom Javnog poziva,
2. se realizuje na području gradske općine koja podnosi prijavu,
3. ima riješene imovinsko-pravne odnose za lokaciju realizacije projekta,
4. osigurava javnu, slobodnu i besplatnu dostupnost prostora,
5. sadrži jasno naznačen iznos sredstava koji se traži,
6. je prijava potpuna, blagovremena i podnesena na propisan način.

Projekti koji ne ispunjavaju opće kriterije neće se dalje razmatrati.

V. POSEBNI KRITERIJI I BODOVANJE

Član 8.

(Kriteriji bodovanja)

Prihvatljivi projekti boduju se prema sljedećim kriterijima:

- stepen spremnosti projekta,
- vlastito učešće gradske općine.

Maksimalan broj bodova iznosi 100.

Član 9.

(Stepen spremnosti projekta)

Stepen spremnosti projekta boduje se na osnovu najvišeg dostignutog stepena pripremljenosti, dokazanog važećom dokumentacijom, i to:

- idejna inicijativa (bez izrađene tehničke dokumentacije) – 10 bodova,
- izrađeno idejno rješenje – 20 bodova,
- pribavljena urbanistička saglasnost / urbanistička dozvola – 40 bodova,
- izrađen glavni projekat na osnovu izdate urbanističke saglasnosti, bez pribavljenog odobrenja za građenje – 55 bodova,
- pribavljeno odobrenje za građenje – 70 bodova,
- projekti tekućeg održavanja, za koje nije potrebna izrada projektne dokumentacije, uz dostavljen predmjer i predračun radova – 60 bodova.

Član 10.

(Vlastito učešće)

Vlastito učešće gradske općine boduje se prema procentualnom učešću u ukupnoj vrijednosti projekta, sa uključenim PDV-om, i to:

- do 10% – 5 bodova,
- od 10% do 20% – 10 bodova,
- od 20% do 30% – 20 bodova,
- preko 30% – 30 bodova.

VI. DOKUMENTACIJA I NAMJENA SREDSTAVA

Član 11.

(Dokumentacija)

Podnosilac prijave dužan je dostaviti dokumentaciju u skladu sa stepenom spremnosti projekta, a posebno:

- urbanističku saglasnost i/ili odobrenje za građenje, ukoliko je isto propisano važećim propisima,
- za projekte tekućeg održavanja: odgovarajuću dozvolu ili saglasnost nadležnog organa, ukoliko je potrebna, kao i predmjer i predračun planiranih radova.

Prijava se podnosi na propisanom prijavnom obrascu koji, između ostalog, sadrži osnovne identifikacione podatke o podnosiocu prijave, uključujući naziv, sjedište i identifikacioni broj (ID broj).

Član 12.

(Namjena sredstava)

Sredstva dodijeljena u skladu sa ovim Pravilnikom mogu se koristiti isključivo za finansiranje izvođenja radova.

Sredstvima se ne finansira izrada projektne, tehničke ili druge planske dokumentacije.

VII. POSTUPAK PROVOĐENJA I RASPODJELE SREDSTAVA

Član 13.

(Komisija)

Gradonačelnik imenuje Komisiju za provođenje postupka dodjele sredstava, koja vrši pregled prijava, bodovanje projekata i primjenu mehanizma raspodjele sredstava.

Član 14.

(Minimalni prag bodova)

U postupak raspodjele sredstava mogu ući isključivo projekti koji ostvare najmanje 50 bodova.

Član 15.

(Proporcionalna raspodjela sredstava)

(1) Dodjela sredstava vrši se proporcionalno, na osnovu odnosa broja bodova koje je ostvario pojedini projekat i ukupnog broja bodova svih projekata koji su ostvarili minimalni prag iz člana 14. ovog Pravilnika, u okviru ukupno raspoloživih budžetskih sredstava.

(2) Odobreni iznos sredstava po projektu ne može biti veći od iznosa navedenog u prijavi.

(3) U slučaju da proporcionalno utvrđeni iznos premašuje traženi iznos, projektu se dodjeljuje traženi iznos, a razlika sredstava se raspodjeljuje ostalim projektima u skladu s istim proporcionalnim principom.

Član 16.

(Rang-lista)

Komisija sačinjava rang-listu projekata na osnovu ostvarenog broja bodova i izvršenog proporcionalnog obračuna sredstava, te istu dostavlja Gradonačelniku.

VIII. ODLUKA I UGOVARANJE

Član 17.

(Odluka)

Odluku o dodjeli sredstava donosi Gradonačelnik Grada Sarajeva.

Član 18.

(Ugovor)

Sa gradskim općinama kojima su dodijeljena sredstva zaključuje se ugovor kojim se uređuju međusobna prava i obaveze, rok realizacije, način isplate, nadzor i izvještavanje.

IX. NADZOR I IZVJEŠTAVANJE

Član 19.

(Pravdanje sredstava)

Korisnici sredstava dužni su izvršiti pravdanje dodijeljenih sredstava najkasnije do 31.12.2027. godine, dostavljanjem narativnog izvještaja, finansijskog izvještaja, izjave o namjenskom utrošku sredstava i bankovnih izvoda.

X. ZAVRŠNE ODREDBE

Član 20.

(Stupanje na snagu)

Ovaj Pravilnik stupa na snagu narednog dana od dana objavljivanja u "Službenim novinama Kantona Sarajevo" i bit će objavljen na službenoj stranici Grada Sarajeva (www.sarajevo.ba).

GRADONAČELNIK

Samir Avdić,s.r.